



中國大事記

民國四年八月十九日

●司法部呈准刑事再理辦法請暫用刑事訴訟律草案各條……前

清修訂法律館所編刑事訴訟律草案。除關於管轄各節。於元年

四年間經司法部呈奉批准暫行援用外。其餘皆不在援用之例。

法院遇有應行請求再審及提起非常上告之件。僅特前清季年所

定死罪施行細則。以為根據。茲司法部以該細則僅粗舉大綱。

且專為利益被告而設。行之頗多窒礙。擬將刑事訴訟律草案再

理編提前援用。特繕草呈請大總統鑒核。並請明定限制。原判
決諭知或決定在批准以前者。不得援用。奉批照准。

●福建設立廈門工藝廠……自上年歐戰發生後。南洋各島失業
華工。紛紛被遣回國。多由廈門登陸。曾經福建巡按使呈請大
總統籌款賑卹。奉令於該省餘存候撥項下提銀三萬元。作為賑
卹之款。當經該省財政廳撥款匯廈。後因遣送各費。均從廈門
紳商捐款並新嘉坡中華商會匯來之英政府補助金支付。此款迄



未動支。現廈門道道尹。特將此款在廈門設一工藝廠。收容回
國華工。授以技能。得免失所。本日。由福建巡按使呈報大總
統。

同 二十日

●公布縣治戶口編查規則：大總統制定公布。(規則見法令門)

●公布警察廳戶口調查規則：大總統制定公布。(規則見法令

門)

同 二十一日

●交通部呈准專用鐵路暫行規則：交通部以經營農工鑛業者。

於水陸短距離間。往往需敷設專用鐵路以供所營事業之用。若

不明定範圍。人民鮮所依據。恐阻滯發達實業之計畫。特擬具

專用鐵路暫行規則十七條。呈請大總統鑒核。奉批照准。(規則

見法令門)

●交通部通告義大利封鎖海面……義大利外交部前通告我國駐
義公使。自五月二十六日起。從奧匈海沿起至義大利北界及

29529

29530 Montelegero 夢得禮庫南界所有口岸島嶼港灣一切等處。及自 Albanarse 亞老巴尼海邊至夢得禮庫北界。及 Cap Kiaphali 基埃發理海尖之北各處。由義國海軍實力封鎖。當由駐義公使咨陳外交部轉咨交通部。本日由部發出通告。

同 二十一日

●特任張錫鑾爲彰武上將軍督理湖北軍務段芝貴爲鎮安上將軍督理奉天軍務兼節制吉林黑龍江軍務……張錫鑾未到任以前。由王占元署督理湖北軍務。

●令撥款振浙災……令曰。據浙江巡按使屈映光電稱。上月二十七八等日。浙省風水爲災。鎮海紹興蕭山餘姚上虞等縣。淹沒漂失。所損甚多。統計各地受災人民。在萬戶以上。田廬牲畜器具損害。不可勝數。實爲從前未有之奇災。擬懇飭部撥給巨款。俾得妥籌賑撫等語。該省金衢道屬。久雨成災。業經本大總統特捐銀一萬元。藉資賑撫。乃未及兩月。颶風暴發。海潮乘之。澎湃汪洋。幾有一瀉千里之勢。以致遭此浩劫。天降之虐。民何以堪。覽電殊爲惻念。著財政部迅撥銀十萬元。再由本大總統捐銀一萬元。趕速匯浙。交該巡按使派員分赴災區查明被災較重情形。分別散放。一面仍飭各屬設法妥籌款項。以資接濟。交內務部查照。此令。

●農商部呈報開辦棉糖林牧等試驗場……財政部前曾籌辦棉糖林牧等試驗場。呈請提前開辦。奉大總統批令照准。當經切實籌辦。現特呈報各試驗場辦理情形。除糖業試驗場因地點未定

暫緩辦理外。其餘棉業試驗場開辦三處。第一試驗場在直隸正定縣南門外。用木廠官地一段二頃八十一畝有奇。第二試驗場在江蘇南通狼山馬場圩。收買民地二百九十五畝。第三試驗場在湖北武昌縣勝門外。用官地三百畝。林業試驗場。設山東長清縣境五峯山。以京師前已設有林藝試驗場。改名第一林業試驗場。因將長清場定名爲第二林業試驗場。種畜試驗場新設二處。一在京師附近西山靜宜園附屬之來遠齋。有地二百餘畝。分飼澳洲購來之美利諾羊二百隻。種牛十隻。一在安徽鳳陽縣石門山。有地三百餘畝。分飼美利諾羊三百隻。原有張家口外東牛羣地方之模範墾牧場。飼養美利諾羊一百隻。蒙古羊二百隻。經改爲第一種畜試驗場。因將西山一場。定名爲第二種畜試驗場。鳳陽一場。爲第三種畜試驗場。均各派員開辦。並訂立暫行規則。頒發各場遵守矣。

同 二十三日

●裁撤成都交涉員缺

●令發銀賑黑龍江水災……令曰。據兼署黑龍江巡按使朱慶瀾先後電呈呼蘭蘭西肇州大齊拜泉青岡綏化湯原龍江泰來海倫巴彥木蘭慶城通河鐵驪通北訥河各屬水災情形。懇頒帑救濟等語。該省呼蘭等縣。春夏之間。霖雨成災。前已電令妥籌撫恤。現綏化各屬。雨水過多。江河暴漲。田廬盡被淹沒。蘭西肇州。受災尤慘。嗟我黎庶。情何以堪。覽電殊深惻念。着財政部速撥銀三萬元。並由本大總統捐銀三千元。尅日匯交該兼巡按使。

飭派委員分赴災區趕放急賑。毋任災黎失所。用副國家軫念民艱之至意。並交內務部查照。此令。

●駐京義使以義國與土耳其宣戰照會外交部……照稱土耳其政府違背最近義土條約所載各款。在義國殖民地諦波里且及西里乃格二處。有陰助交戰行爲。並在該國境內。阻礙多數義國人民自由交通。義國人民願回國者。亦被阻滯。本月三號。義國政府會將最後通牒送至土京。乃該國政府。雖有多數正式之承諾。而其在該殖民地仇視義國情形。仍然未改。外交談判。既難收效。義政府對於土國。應即宣戰云云。

●籌安會宣告成立……籌安會發出啓事。略謂本會自發起後。所有與各界接洽商辦之事。至爲繁重。幾於日不暇給。欲照尋常黨會手續。俟會員人數衆多。再行宣告成立。實有迫不及待之勢。現由本會同人。先行議定簡章。並照章推定理事長副理事長。暫時處理會務。以便進行。經推定楊度爲理事長。孫毓筠爲副理事長。嚴復劉師培李燮和胡瑛等爲理事。當日通告各會員。略謂本會宗旨。原以研究君主民主國體二者。以何適於中國。專以學理之是非。與事實之利害。爲討論之範圍。例如中國數千年。何以有君主而無民主。又如清末革命之結果。何以不成君主而成民主。又如共和實行以後。究竟利害孰多。又如世界共和國家。何以有治有亂。諸如此類。皆在應行討論之列。然討論範圍。亦僅以此類爲限。至此範圍以外各事。本會概不涉及。以此爲至嚴之界限。同日通電各省將軍巡閱使巡按使都統

護軍使各省城商會上海漢口商會云。我國辛亥革命之時。人民激於情感。但除種族障礙。未計政治進行。倉卒制定共和國體。國情適否。不及三思。深識之士。明知隱患方長。而委曲附從。以免一時危亡之禍。故自清室遜位民國創始絕續之際。以至臨時政府正式政府遞嬗之交。國家所歷危險。人民所感痛苦。舉國上下。皆能言之。長此不圖。禍將無已。近者南美中美二洲共和各國。如巴西阿根廷祕魯智利猶魯衛芬尼什拉等。莫不始於黨爭。終成戰禍。葡萄牙近改共和。亦釀大亂。墨西哥自參亞士遜位。黨魁擁兵互競。勝則據土。敗則焚城。卒至五總統並立。陷國家於無政府之慘象。我國亦東方新造之共和國家。以彼例我。豈非前鑒。美國者。世界共和之先達也。美之大政治學者古德諾博士。即言君主實較民主爲優。中國尤不能不用君主國體。此義非獨古博士言之也。各國明達之士。論者已多。而古博士以共和國民而談共和政治之得失。自爲深切著明。乃亦謂中美情殊。不可強爲移植。吾國人士。乃反委心任運。不思爲根本解決之謀。甚或明知國勢之危。而以身毀譽利害所關。憚於發議。將國民義務之謂何。我等身爲中國人民。國家之存亡。卽爲身家之生死。豈忍苟安默視。坐待其亡。本會之立。特以籌一國之治安。研究君主民主國體二者。以何適於中國。專以學理是非。事實利害。爲討論之範圍。至範圍以外各事。本會概不涉及。以此爲至嚴之界限。將以討論所得。貢之國民云云。翌日又電各省將軍巡按使都統巡閱使護軍使各省城

29532

商會上海漢口商會。略謂本會宗旨。昨已電達。惟事關根本安危。應合全國上下。共同研究。擬請派遣代表來京。加入討論。如承允許。乞將代表姓名電知。以便接洽。當經各省紛紛覆電贊成。並允派代表入會矣。

同 二十四日

●財政部公布銀行公會章程……財政部訂定公布。(章程見法令門)

●青島日軍開始撤退……青島日德戰事解決後。我國即向日本提出交涉。將山東方面劃定之戰事區域撤銷。嗣因日本提出要求條件。此事遂致懸閣。本月九日。我國外交部復與日本公使開始交涉。業就妥協。定本日起。日軍陸續向青島方面撤去。至下月十號。將龍口高密一帶之兵撤盡。

同 二十五日

●特任胡景伊為毅威將軍

●特任陳宦為成武將軍督理四川軍務

●任命胡景伊為參政院參政

●中日實施新訂滿蒙條約……我國與日本新訂滿蒙條約。其中第二第三第四第五等項。自本日起。完全實施。我國外交內務農商三部。各派員赴奉參與實行。但因警察法令及課稅規則。尙未議定。故暫照從前辦理。政府又為慎重外交計。並特設一中日條約實施委員會。預為籌備。其委員為國務卿左右丞外交總次長及中外顧問數人。

●決定敷設內蒙電線……政府為便利內蒙交通起見。特擬在內蒙敷設電線。曾經派員往勘。已決定敷設三線。(一)自張家口經多倫諾爾而達蒙古。(二)自奉天經洮商縣札魯特布旗浩罕特旗茂明旗而達綏遠。(三)自熱河經朝陽赤峯翁牛特旗巴林旗科爾沁旗而達洮南。此三線合計千六百四十餘英里。經費總額共洋一百二十萬元。

●廣東新會發生大械鬪案……廣東新會縣屬林梁鍾李伍莫袁諸姓。與陳譚阮葉戴蘇各族。素有仇隙。近復因事大起械鬪。互相焚殺。計焚去村落十餘處。戕殺男女無數。經該省大吏派兵前往彈壓。

同 二十六日

●任命張懷芝為察哈爾都統……原署何宗蓮。調京另候任用。

●財政部呈籌辦民國實業銀行……財政部以實業之發達。全賴銀行輔助。我國商業銀行。日漸增設。而實業銀行。尙付闕如。非由政府厚集資本。專案辦理。不足以資提倡。因與中國銀行細加討論。酌擬民國實業銀行章程四十條。並招股章程二十條。呈請大總統鑒核。又以銀行實業。與運輸及保險兩種業務。互相為用。並請即由民國實業銀行酌量附設。以期互相維繫。至民國實業銀行。資本二千萬元。其中公股一千萬元。由中國銀行擔任。並擬先籌二百萬元。以便從速開辦。至商股一千萬元。俟招股章程批准後。即行邀集巨商。作為創辦。分投招募云。

同 二十七日

●任命唐在禮爲參謀次長

●申令各省不得攤派印花……令曰。據財政部呈稱。印花稅法。頒行已久。未收實效。亟應籌擬整頓方法等語。印花一稅。原爲證明人民權利之憑據。果如該部所呈。各省領到印花。財政廳攤之各知事。知事攤之各村鎮。層層攤派。但求售盡。並不注意貼用。勢必至無需印花之人。強加攤派。應貼印花之件。反邀倖免。殊失推廣印花本意。著各省巡按使財政廳飭屬一面剴切勸導。一面認真檢查。倘有不遵章貼用者。照章處罰。並准由人民舉發。即以罰金分別照章充賞。用資鼓勵而期實行貼用。不得再事攤派。以杜滋擾而符名實。此令。

●全國師範校長會議閉會……全國師範校長會議。原定會期爲兩星期。於本日舉行閉會式。翌日。由大總統接見各師範校長。面致訓辭。

同 二十八日

●公布立法院議員選舉法第六章初選舉施行細則……大總統制定公布。(細則見法令門)

●公布國民會議議員初選舉施行令……大總統制定公布。(令見法令門)

29533
●外交部訂定聘用洋員合同條例……外交部以吾國人才缺乏。借才異地以收他山之效。原無不可。乃京外各機關聘用洋員。往往不諳外情。訂立合同時。不知審慎。非損失權利。卽別滋糾葛。以致時有交涉發生。殊非慎重之道。特訂定聘用洋員合

同條例五條。呈准通行各機關照辦。(一)非必要時。不得聘用洋員。(二)聘用年限薪金。須預爲規定。(三)洋員只可條陳意見。不得干預內政。(四)品行有損者。應立即撤退。(五)洋員非有切實理由。不得中途辭職。

同 二十九日

●令准陸軍總長段祺瑞免職……令曰。陸軍總長段祺瑞。前因患病迭次呈請開去各項差缺。業經先後給假三個月。俾資調理。該總長公忠體國。卓著功勳。深望早日就痊。銷假任事。茲復呈稱病難速愈。續請開去差缺。以冀安心靜養等語。情詞懇摯。出於至誠。段祺瑞應准免去陸軍總長本職。仍留管理將軍府事務及統率辦事處辦事員。以節勤勞而資倚任。此令。

同 三十日

●財政部呈准設黑龍江採金局……黑省產金饒富。舊有官辦金廠。漢河庫瑪觀都奇乾河等四處。又官商合辦餘慶溝一廠。惟從前辦法。率就民間已開之礦。官爲領照。抽收金砂。爲數無多。且產金各處。多任鑛丁自由開挖。不加部勒。以致濫嘗輒止。遷徙靡常。財政部爲整理起見。擬就黑河地方。設立黑龍江採金局。接收官辦各廠。并管理官商合辦之餘慶溝一廠。派局長一員。統籌全局。規畫收採金砂運儲糧糧改良化煉一切事宜。并派駐廠監督一員。輪赴各鑛駐廠監督工作。所需資本。約計四十萬元。本日。呈請大總統鑒核。並請簡派局長及駐廠監督。

29534 奉批照准。並令派朱照爲黑龍江採金局局長。劉文鳳爲黑龍江採金局駐廠監督。

同 三十一日

●裁撤大通蕪湖鎮守使員缺
●申令參政院代行立法院開會……令曰。依約法第六十七條。立法院未成立以前。以參政院代行其職權。又依立法院組織法第八條。立法院之開幕日期。自每年九月一日起。至十二月末日止。本年立法院猶未成立。所有約法規定屬於立法院之職權。參政院應即按照會期代之。此令。
●公布國民會議議員初選選舉日期暨籌備期限令……大總統制定公布。(令見法令門)

九月 一日

●參政院代行立法院開會……參政院代行立法院。於本日舉行開會典禮。大總統派國務卿代表蒞院行禮。是日。有山東江蘇甘肅雲南廣西湖南新疆綏遠等省人。呈遞變更國體請願書。
●民國實業銀行成立……民國實業銀行。自財政部呈准開辦後。即由部派員籌備。於本日正式成立。
●中日間發生間島交涉……我國與日本從前訂有間島協約。約中規定居住間島之韓民。服從中國法律。歸中國地方官管轄裁判。韓民訴訟。由中國官吏照中國法律審判。此次中日締結新約。關於滿蒙各項條約。載明本條約所未規定者。從前兩國之約。仍爲有效。約中於間島問題。並未規定。故從前之間島協

約。當然有效。但日人強謂間島在滿蒙條約範圍以內。應將前約廢棄。日前間島日本領事。竟頒布命令。在間島實施新約。當經我國間島延吉道尹。向日領提出抗議。并電巡按使請外交部據理力爭。當經外交部向駐京日本代理公使正式提出抗議。
●張綏鐵路大同至豐鎮通車……京張鐵路延長之張綏綫。係由張家口起。西行經山西西北部之大同縣。而至綏遠廳。綏遠在歸化城西五華里。爲目下所定此綫最北之一點。自張家口至大同一段。前已通車。現又造成自大同至豐鎮一段。長一百華里。綫路正向南北。豐鎮在大同之北。長城之外。已在蒙古草場範圍之內。此段已於本日開車。

●湖南造幣分廠改組……湖南造幣分廠。早經財政部限令停鑄。歸併鄂廠。屢經該省巡按使咨商展緩。前湖南銀行財政監理官。以省中紙幣充斥。全恃銅圓接濟。一經停鑄。銀行將立見阻滯。特詳巡按使咨陳財政部。請將造幣分廠縮小範圍。改歸湖南自辦。脫離中央監督。以供銀行活動。業經財政部核准。於本日實行改組。

●上海法租界抽籤勒閉煙膏店……上海法租界內。共有煙膏店一百八十六家。法工部局特議決分四期禁絕。於本日抽籤。抽去四分之一。限兩個月內閉歇。

同 二日

●財政部呈准中國銀行添招商股……財政部據中國銀行詳稱。本銀行則例第三條。內載中國銀行。由政府先交所認股份三分

之一以上。開始營業。一面招募商股等語。本銀行自開辦以來。於今三載。已設分行分號一百四十有餘處。每年出入有二萬萬圓之多。現除再增官股外。並照則例先行定招商股一千萬圓。以資營業。謹擬招集商股章程共六十五條備文詳請查覈。並請轉呈立案。當由部轉呈大總統。奉批如擬辦理。

●陸海軍部議決擴充兵工廠船廠：陸海軍參謀三部及統率處。議決擴張各省兵工廠船廠案。其大略如下。(甲)兵工廠。(一)漢陽廠專造機關槍礮。(二)淞滬廠專製步槍。(三)石井廠專製機關槍礮步槍子彈。(乙)船廠。(一)黃浦廠專造魚雷驅逐等艦。(二)馬尾廠專製礮艦。(三)煙臺廠專造海防要塞礮艦。以上各廠。均加增機器。推廣範圍。預算款項。共需一千五百萬元。

同日

●西藏會議之進行……自外蒙問題解決後。西藏達賴。曾向政府聲明歸服中國。駐英公使。亦報告政府提議此事。我國政府已與英政府決定。以英京倫敦為會議地點。並加派駐英公使施肇基為會議西藏交涉之全權公使。

同日

●農商部組織內蒙調查隊……農商部與蒙藏院。為實地調查內蒙之鑛業森林。特組織內蒙調查隊。陸續出發。計分三隊。第一隊調查熱河及東蒙一帶。第二隊調查東四盟之西北全部。第三隊調查西二盟及阿拉善額魯特旗額濟納土爾渾特旗全部。

29535

●湖北蝗災復起……湖北自七月間發生蝗禍。經官吏設局會紳

搜捕。旋稱肅清。近復有飛蝗過湖北省城。面積寬約三里。天日為黑。

同日

●公布國民會議議員覆選舉日期暨籌備期限令……大總統制定公布。(令見法令門)

●公布國民會議議員單選互選選舉日期暨籌備期限令……大總統制定公布。(令見法令門)

●令撥賑賑廣西水災……令曰。據護理廣西巡按使田承斌電呈。南寧蒼梧桂林柳州南鎮南各道屬邕寧等三十餘縣。均被水災。洪水漂流。徧成澤國。災民流離數十萬。廬屋沖塌十餘萬間。田禾財產牲畜。蕩然無存。慘象不可言狀。乞再賜賑卹等語。前廣西靈川等十三縣水災。業經特發賑款五萬元。交該省巡按使派員賑撫。茲全省復有數十縣重罹鉅災。哀鴻徧野。深堪憫惻。著財政部再發銀五萬元。並由本大總統捐銀五千元。迅即匯交該巡按使分派委員趕辦急賑。並著妥籌善後。講求水利。以防後患而拯民生。此令。

同日

●大總統在代行立法院發表對於變更國體之宣言……參政院代行政事堂左丞楊士琦蒞院發表宣言書。略謂本大總統受國民之付託。居中華民國大總統之地位。四年於茲矣。憂患紛乘。戰兢日深。自維衰朽。時虞隕越。深望接替有人。遂我初服。但既

29536
在現居之地位。卽有救國救民之責。始終貫徹。無可諉卸。而維持共和國體。尤爲本大總統當盡之職分。近見各省國民。紛紛向代立法院請願改革國體。於本大總統現居之地位。似難相容。然大總統之地位。本爲國民所公舉。自應仍聽之國民。

且代行立法院。爲獨立機關。向不受外界之牽掣。本大總統固不當向國民有所主張。亦不當向立法機關有所表示。惟改革國體。於行政上有甚大之關係。本大總統爲行政首領。亦何敢畏避嫌疑。緘默不言。以本大總統所見。改革國體。經緯萬端。極應審慎。如急遽輕舉。恐多窒礙。本大總統有保持大局之責。認爲不合事宜。至國民請願。要不外乎鞏固國基。振興國勢。如徵求多數國民之公意。自必有妥善之上法。且民國憲法。正在起草。如衡量國情。詳晰討論。亦當有適用之良規。請貴代立法院諸君子。深注意焉。

●俄人招募華工交涉……俄人前在煙臺龍口及中東南滿兩路線各處。招募華工。赴俄開礦。嗣駐京德公使。以俄人招去此項華工。係充俄國兵士。特向我外交部質問。外交部當向駐京俄使提出抗議。

同 七日

●五國銀行團拔還善後借款餘款……民國二年之善後借款。本餘百萬磅。爲改良鹽務之用。嗣鹽務會辦丁恩氏核計。只須二十五萬磅。五國銀行團。又扣除春間到期之短期借款二十萬磅。現已將五十五萬磅盡數拔還我國。以充行政經費之用。

同 九日

●肅政廳呈請取消籌安會……略謂自籌安會成立以來。雖宣言爲學理上之研究。然各地謠言蜂起。大有不可遏抑之勢。楊度身爲參政。孫毓筠曾任約法議長。彼等唱此異說。加以函電交馳。號召各省軍政兩界。各派代表。加入討論。無怪人民驚疑。雖經大總統派員在參政院代行立法院發表意見。剴切聲明。維持共和。爲大總統應盡之職分。並認忽遽變更國體。爲不合事宜。然日來人心並不因之稍安。揆厥所由。無非以籌安會依然存在之故。應懇大總統迅予取消。以靖人心云云。奉批交片內務部。謂世界各國。有君主民主之分。要不外乎本國情爲建設。以達其鞏固國家保全種族之宗旨。中國當君主時代。厲禁討論民主政體。而祕密結社。煽惑不絕。實於共和原理。毫無識解。迨潮流所至。一旦爆發。更無研究之餘地。迄至今日。不但人民無共和之智識。卽居議政行政之地位者。眞能透澈共和之原理。百不一覩。而一部分人民主張君主之說。暗潮鼓盪。已非一日。前車之鑒。可爲寒心。恐其於君主原理。猶之初創共和時代之茫昧隔膜。講學家研究學理。本可自由討論。但具有界說。不可逾越範圍。著內務部確切考查。明定範圍。示以限制。通飭遵照。

同 十日

●令懲辦被參福建官吏……令曰。前據肅政史夏壽康等呈劾福建巡按使許世英。劣跡昭著。貽害地方等語。當經派令王祖同

前往確切查明呈覆核奪。茲據覆稱原參所指揮已用人理財諸端。多有傳聞之誤。逐案調查。就地考察。按諸事實。徵之案牘。

並摘錄證據。據實呈覆等語。福建巡按使許世英。既查無溺職殃民情事。雖於屬員嬉游。暨案犯朦請槍斃。均有失察之咎。

惟該巡按使到任以來。尙能奮發圖治。策勵進行。深知顧全大局。自是過不掩功。著從寬免其置議。省會警察廳長龔才朗。

烟酒局長汪守坻。狎妓徵逐。有玷官箴。前署閩侯縣知事童益臨。判案兩歧。輕重失當。前代理浦城縣知事張必明。輕罪人犯。朦請槍斃。代理南安縣知事馬振理。匿案不報。專事科罰。

署龍溪縣知事陳家棟。苛捐擾累。款多濫支。均著先行解任。交文官高等懲戒委員會。依法懲處撤任。晉江縣知事劉嶽崙。

縱兵釀案。致斃多命。勒罰鉅款。顯有侵吞。著先行褫職。與縱兵搜搶之警備排長舒翰臣。并交法庭從嚴懲辦。並由該巡按使將該省警察支費。嚴核刪減。南安縣罰款。勒令詳報。龍溪縣苛細各捐。分別停止。餘均照所擬辦理。並交內務財政司法

三部。分別轉行知照。此令。

●俄開蒙鑛交涉……自庫倫宣告獨立後。俄人即將外蒙各處鑛山隨意採掘。近交涉就緒。庫倫已取消獨立。俄人猶率領工程師多名。至庫倫對岸阿什喀地方。準備各種機械。謀開某大金

鑛。又據中央派往蒙古之鑛山調查員報告。謂外蒙各旗所有之鑛山。互千餘里。均在俄人掌握。且根蒂甚深。政府以我國在

今日。已有蒙古宗主權。則開採鑛山。應遵照我國預定之鑛業

條例。已據此理由與俄使提起交涉。

同 十一日

●哈爾濱中俄軍隊衝突……哈爾濱中東鐵路車站附近。因有胡匪騷擾。中俄各派軍隊前往捕勦。以天黑不能辨認。致起衝突。互有死傷。並捕虜多人。當經兩國駐哈外交官協商交涉矣。

●外交部組織外交討論會……外交部以中國外交。向來臨事乃謀對付。故恆緩不及事。此次歐亂。既爲世界歷史上未有之大戰爭。將來和議。必於全球大局有大變更。若不預先研究。恐屆時因應失宜。或張皇誤事。則無形之損。必非甚小。用特組織一外交討論會。當蒙大總統批准。其討論之大綱如下。(一)中國於萬國和議時必取得發言權。(二)中國對於萬國和議之地位。

(三)中國對於萬國和議之宗旨。(四)中國對於萬國和議之希望。

同 十四日

●甘肅環縣匪徒戕官據城……甘肅匪徒。因加稅作亂。聯結陝匪。攻陷環縣城。戕縣知事李禕。圍慶陽縣。並有仇教舉動。已焚燬教堂兩所。殺中國教徒五人。

同 十五日

●奉天胡匪戕殺日軍交涉……奉天自施行中日新約後。卽有日軍數十人。分赴北路各縣。有數人行至昌圖梨樹兩縣交界之勾界堡地方。突遇胡匪。被擊斃日兵兩名。並將槍械劫去。當經該處地方官向日領商阻日軍出發。並爲緝匪究辦。

29537

同 十六日

●內務部呈復限制籌安會……略謂治安警察之要義。一方在保障人民之自由。一方在維持公安之秩序。政談集會。本為講學家研究學理之資。其界說屬於言論。從前君主時代。於討論共和之政論。深閉固拒。故其原理未遑曉暢。而其說輸入人心。乃醞釀於秘密煽惑之中。一發而不可收拾。易地以思。可為殷鑒。是則關於言論。固不妨任其自由。本部有保持安寧之責。自該會發生以來。即經飭警察廳。分派長警。隨時監視。以為切實考查地步。該會發起人。皆學識閎通聲望卓著之才。於此項討論界說範圍。亦已鄭重聲明。茲奉諭令通飭到部。遵當督飭警察廳嚴重考查。令不逾越政談集會當守之範圍。倘認為有擾亂秩序之虞。及其他秘密之行為。警察官吏。職有專司。自當加以干涉。俾有限制而保治安。其在各省地方。與該會政談有同一之集合者。該地方行政官署。應即查照諭令意旨。暨本部所定範圍。認真考察。以免放任。

同 十七日

●奉天長白胡匪猖獗……奉天長白縣。本日突來胡匪二百餘人。攻撲縣治。縣署監獄及採木局均被劫。經軍警與之對敵。斃匪數人。始各竄走。

同 十八日

●特任段芝貴兼署奉天巡按使
●令張元奇署理內務次長

同 十九日

●北京發起全國請願聯合會……各省向參政院請願變更國體諸人。在京組織一全國請願聯合會。於本日宣告成立。推定沈雲霈為會長。邢彥圖張鎮芳為副會長。
●天津法領事越界收捐交涉……天津法租界南牆子河外海光寺一帶地方。本係完全中國領土。日前法領事忽發傳單。指為法國推廣租界。令居民完納租稅。經商民全體反對。要求當道嚴重交涉。外交部特派次長曹汝霖赴津前往調查。

同 二十日

●代行立法院建議召集國民會議解決國體問題……參政院代行立法院。於本日咨送建議書於政府。略謂本院前據各地方各團體人民遞到國體請願書共計八十二件。當即交付審查。旋據審查會開會一再討論。僉謂國體所關。事端重大。綜其主旨。實為鞏固國基振興國勢起見。將來憲法起草。當能本全國國民期望久安長治之心。詳議妥籌。垂為令典。惟國體為憲法上重要問題。解決之權。應在國民會議。應由本院根據約法第三十一條第七款。建議政府。請政府提前於年內召集國民會議。為根本上之解決。抑或另籌徵求民意妥善辦法。以定大局而安人心。除將請願書全份咨送外。特此建議。

●陸海軍部組織國防會議……陸海軍參謀部及統率辦事處。為會議國防事宜。特組織一國防會議。以王士珍為總會長。蔡鏗為副會長。其餘委員。陸海軍參謀三部及將軍府統率處各調二員。